



Takornariartitsinernut suliassaqarfimmi piffissamut ikaarsaariarfiusumut 2023-2024-imut periusissiaq





Naalakkersuisut

Nunanut Allanut, Inuussutissarsiornermut Niuernermullu Naalakkersuisoqarfik

Tel +299 34 50 00

Postboks 1601

3900 Nuuk

Kalaallit Nunaat (Grønland)

www.naalakkersuisut.gl (Naalakkersuisut pisortatigoortumik quppersagaat)

www.tradeinvest.gl (Nunanut Allanut, Inuussutissarsiornermut Niuernermullu Naalakkersuisoqarfiup aningaasaliissuteqartarnermut quppersagaa)

www.greenland.com (Visit Greenland -ip quppersagaa)

Imaasa allassimaffiat

1. Aallarniut.....	3
2. Ataqaatigiissaagaasumik takornariartitsinerimi suliniutit.....	4
Nunap immikkoortuini tullerriaarinerit.....	4
Towards Better Tourism (TBT) inassuteqaatit.....	4
Visit Greenland.....	4
Takornariaqartitsinerimut immikkoortumi pilersaarut 2025-2035.....	5
Alliartorneq aamma ineriartornermi misissueqqissaarneq.....	5
3. Periusissiami tullerriaarinerit (2023-2024).....	6
3.1 Atugassarititaasutut killiliussat.....	6
Suliniut 1 – Takornariartitsinerimut inatsit nutaaq, akuersissummik peqarfiusumik takornariartitsisarnernut inatsit aamma takornariartitsisarnermut attuumassuteqartut inatsisit allat.....	6
Suliniut 2 – Umiarsuit takornariartaatit ingerlatsinerat.....	7
Suliniut 3 - Akitsuutit.....	7
Suliniut 4 – Takornariartitsinerimik assigiissaaraluni aaqqissuussineq.....	8
Suliniut 5 – sumiiffinni najugalinnik peqataatitsineq.....	8
Suliniut 6 – Piujuannartitsisumik inuussutissarsiuutitigut ineriartortitsineq.....	8
3.2 Tikeraanut tikittartunut tikisitsisarfiit.....	9
Suliniut 7 – Attaveqaasersuutit nukittorsakkat.....	9
Suliniut 8 – Pinngortitaq allannguajaatsoq – kulturikkut misigisassat.....	9
Suliniut 9 – Piffissap takornariartitsiviusartup sivitsorneqarnissaa.....	10
3.3 Piginnaasanik ineriartortitsineq.....	10
Suliniut 10 – Ilinniartitaanerit nukittunerusut aamma piginnaasaqarluarneq.....	11
Suliniut 11 – Ilisimasanik annertusisanik peqarnissaq.....	11
4. Suliniutissat aalajangersimasut.....	12
5. Takornariartitsineq kisitsisinnngorlugu.....	15



1. Aallarniut

Timmisartunut mittarfiit nutaat ullunik inuuffigisatsinnik allannguisussaapput, sumiluunniit najugaqaraluarutta soorluttaa umiarsuarnut ilaalluni takornariartarnerup annertuseriarnera annertoq malunaateqarujussuassasoq. Naalakkersuisunut aalajangiisuvoq aningaasarsionnikkutt qaffariaataasussat timmisartullu mittarfissuisa nutaat kingunerisassat umiarsuarnullu takornariartaatinut ilaallutik takornariartartut amerlariaatissaat nunatsinni innuttaasunut inuussutissarsiortunullu ataatsimut tamanut iluaqutaassasut.

Piffissami matumani suli pissusiulersinnaasunik takornariartitsinerup ineriartorneranut atatillugu mittarfissuit nutaat atorneqalerpata pissusiulersinnaasunik sulimaanna ilisimaneqanngitsunik peqarpoq. Suli akiliulersussat annertussuserilerumaagaat, timmisartut suminnaaneertarnissaat sumullu ingerlasarnissaat imaluunniit timmisartortitseqatigiiffiit kikkut ingerlatsisuujaarnissaat ilisimannigilugut. Ilanngullugulu nassuerutigisariaqarparput naak takornariartitsinnermik ingerlatsineq ukiuni amerlasuunngortuni inuussutissarsiutaagaluartoq, amigaatigineqarmata aaqqissuussaasunik tunngaviusunik ilisimasassat, takornariartitsineq ullumikkut inuussutissarsiutitut isigalugu. Tamatuma saniatigut imartatsinni umiarsuit takornariartaatit amerleriaataasa ersarissarpaat pisariaqartitsisugut ersarinnerusumik periusissiaqarnissarput, suliassaqarfimmillu tamatuminna aqutsinissarput.

Taamaattumillu Naalakkersuisut aalajangersimapput piffissamut ikaarsaariarfiusumut periusissiamik ukiunut 2023-2024-imut suliaqarniarlutik. Piffissamut ikaarsaariarfiusumut periusissiami aallunneqassapput suliassaqarfiit pingaernerit aallartilikkagut, sapinngisamik pitsaanerpaamik takornariartitsinnermi ineriartortitsinnaajumalluta. Piffissamut ikaarsaariarfiusumut periusissiaq taamaasilluni aamma isigineqarsinnaassaaq ingerlatsinerup pilersaarusiatus, qularnaarisussaq pissusit tunngaviusut inissaminiinnissaannik. Tamanna alloriarnerussaaq takornariaqartitsinerup immikkoortumi pilersaarutaani, piffissamut ikaarsaariarfiusumut periusissiamik assiliartaliisussaq, piareersaasussaq, paasinarsarisussaq aammalu tunngaviliissalluni siunissami ukkatarineqartussami pingaaruteqarluinnartumi.

Piffissamut ikaarsaariarfiusumut periusissiaq sularineqarpoq takornariartitsinnermi ingerlatseqataasut amerlasuut ilanngussassanik tunniussaartarnerisigut. Naalakkersuisut suliassami tamatumani atugassatut ilanngussat amerlasuut qujassutigaat, taakkua takussutissiimmata ataatsimut isigisunik suliniuteqarfigisassatsinni ujjartorneqarnerisi.

Naalakkersuisut takorloorpaat takornariartitsineq piujuaannartitsinnermik tunngaveqartoq, inuiaqatigiinnut pitsaasunik tunniussaarfiusoq. Kissaatigaarput takornariartitsinnermik inuussutissarsiut nunatsinnut takornariartup misigisaqarfigisagassaa pinngortitamik avatangiisitsinnik, kulturitsinnik aammalu oqaluttuarisaanitsinnik. Tamakkua tikeraanut saqqummiussortarnerini piumasaavoq najukkani pissutsinik ilisimasaqarneq, taamaattumillu Naalakkersuisut kissaatigaat takornariartitsinnermik ingerlatsinerup nunatsinnit namminermit inuillu najugaqarfiit sorlaqartumik ingerlanneqarnissaa.

Tamatumalu saniatigut pissusissamisoortumik isumalluarfiullunilu naatsorsuutigineqarpoq takornariartitsinerup inuiaqatigiinnut isertitsissutaanerulernissaa, apeqqutaatinnagu takornariartitsisarneq qanoq ittoq ingerlanneqarnerisigut. Takorluukkat naammassineqarluutik anguneqassappata piumasaqaataavoq qanittumik suleqatigiittoqarnissaa, ataqatigiissaarisooqarnissaa oqaloqatigiittoqarnissaalu, Naalakkersuisullu tamanna tunngavigalugu ikaarsaariarnermut periusissiaq alloriarnertut ilorraap tungaanut ingerlasutut isigaat.

Atuarluarisi

Naaja H. Nathanielsen

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoq



2. Ataqtigiissaagaasumik takornariartitsinermi suliniutit

Nunap immikkoortuini tulleriaarinerit

Piffissamut ikaarsaariarnermut periusissiasami matumani atortussat tunngaviusut aallaaveqarput nunatsinni kommuninik nunallu immikkoortuini ingerlatsisunik oqaloqateqartarnernik. Nunap immikkoortuini ingerlatsisunit tunniussat takornariartitsineq pillugu isumasioqatigiinnermeerput, nunatsinni illoqarfinni assigiinngitsuni ukiuni kingullerni ingerlanneqartarsimasuniit. Nunap immikkoortuini ingerlatsisuniit tunniussat periusissiami immikkoortunut aallunneqartussanut annertuumik atornerqarput. Nunap immikkoortuini ingerlatsisuniit tunniussat ilassuserneqarput Visit Greenland -imiit aamma takornariartitsinermi inuussutissarsiummiit.

Towards Better Tourism (TBT) inassuteqaatit

Nunatsinni takornariartitsinerinik inuussutissarsiortut aamma namminneq inassuteqaateqarput, takornariartitsinermik inuussutissarsiutit siunissamut sammisumik ineriartortinneqarnissaannut. Tamanna pivoq Visit Greenland-ip 2023-ip upernaavani isumasioqatigiissitsinerani taaneqartumi »Towards Better Tourism« (TBT). Tassani takornariartitsinermik ingerlatsisut isumaqatigiissutigaat immikkut sammillugit aallunneqassasut tulleriaarinerit 9-it, siunissamut sammisut, takornariartitsinerit ineriartorteqinneqarnissaannut atasut.

Inassuteqaatit illinitisialaapput takornariartitsinermik inuussutissarsiuteqartut kissaataanni, Naalakkersuisunit taamaasillutik ilanngunneqartut tulleriaarinerinut matumani ikaarsaariarnermi periusissiami.

“Towards Better Tourism” -imi inassuteqaatit qulingiluat:

1. Takornariartitsineq ataqtigiissoq suleqatigiiffiusorlu
2. Ukioq kaajallallugu takornariartitsineq, najukkani inuunermik nakussatsitsisoq
3. Attaveqatigiinnermi atortut perrassarneqassapput
4. Piujaannartitsineq siulliullugu
5. Najukkani takornariartitsineq aallullugu pitsaassusissallu qaffallugit
6. Pikkorissuujumavugut, Kalaallit Nunaannilu inuusuttunut periarfissanik ammartseraluta
7. Qularnaarumavarput najukkani piginnittuuneq peqataanerlu
8. Nunarsuarmioqatitta kulturperput naapissavaat malugissallugulu
9. Inerisaaneq nukittorsagaq nioqquutillu neqeroorutaasut ineriartortsinneri

Visit Greenland

Visit Greenland A/S -imi aaqquissuussinerit ingerlatsinerillu ilalersussavaat piviusunnortillugulu Naalakkersuisut periusissiaat ulluinnarni suliatigut, ilaatigut paasissutissanik katersisarnikkut, takornariartitsineq pillugu siunnersuinikkut, Kalaallit Nunaannik takornariartarfittut ussassaarisarnikkut, kiisalu inuussutissarsiut ineriartortissallugu takornariartitsinerimut siuarsaataasutigut suliniutitsigut ilisarititsisarnertigullu.

Piffissamut 2021-2024 Visit Greenland nammineq periusissiaminik ussassaarisarnermut niuerfiusunillu ineriartortitsinerimut atatillugu suliaqarsimavoq.

Periusissiaq taaguuteqarpoq ” Takornariaqarnerulernissamik siunertaq – ataatsimoorussanik suliniutit ineriartortitsinerimut, inerisaanermut akisussaassuseqartumillu takornariartitsinerimut”. Visit Greenland-ip immikkut ataaniittut qulequttat sisamat erseqqissaatigisimavai:



1. Misigisassarsiortitsilluni takornariartitsisarnerit piumaneqarnerulernissaat
2. Ukioq kaajallallugu Kalaallit Nunaanni tamarmi takornariartitsisarneq
3. Ilisimasanik avitseqatigiittarneq aamma piginnaasanik kivitsineq
4. Atugassarititaasunik iluaqutaasunik siuarsaaneq

2025-imiit Visit Greenland-ip periusissiaa toqqaannartumik Naalakkersuisut takornariartitsinermit immikkoortumi pilersaarutaani ilaalissaaq, taamalu ataatsimoorussamik periusissiamik suliaqartoqartalerluni.

Naalakkersuisut maluginiarpaat ingerlatsisunit assigiinngitsunit ilanngunneqartartut arlalitsigut assigiittarneri. Tamanna nukittoqutitut isigisariaqassaaq aamma uppernarsaatitut ataatsimut isumaqatigiittoqarnernik sutigut suliniutissat siullunneqartussat annertunerunerannik. Naalakkersuisut suussusilersorsimavaat sammisassat immikkut toqqartorneqartut aqqanillit, piffissami periusissiap atuuffigisaani pingaarnertullugit sulissutigineqartussat. Tunngaviusutut paasissutissat ersarissumik tikkuartorpaat atugassarititaasutut killiliussat nukittorsarneqartariaqarnerat aammalu tikeraanik tikisitsisarfiit annertusartariaqarneri.

Takornariaqartitsinermit immikkoortumi pilersaarut 2025-2035

Naalakkersuisut takorluugaat, anguniagaat, suliniutaat aammalu politikki ukiuni qulini pilersaarutit naatsorsorneqassaaq immikkoortortanut takornariaqarnikkut attuumassusilinnut.

Nunatsinni immikkoortortat nammineerlutik takornariaqarnikkut akisussaaffimmik tigusissapput, namminneq periusissiamik aammalu siunissaq ungasinnerusooq pilersaaruteqarnikkut. Assersuutigalugu ilinniartitaanikkut immikkoortoqarfimmi takornariaqarneq ilanngunneqarsinnaavoq meeqqat atuarfianni 1. Klassiniit ilinniarfeqarfinnut qaffasinnerpaanut. Takornariaqarnikkut ilinniarfiit pikkorissaanerillu tulluarsarneqassapput inuussutissarsiornermi pisariaqartitsineq najoqqutaralugu.

Tamanna alloriarnerussaaq takornariaqartitsinermit immikkoortumi pilersaarutaani, piffissamut ikaarsaarfiusumut periusissiamik assiliartaliisussaq, piareersaasussaq, paasinarsaarisussaq aammalu tunngaviliissalluni siunissami ukkatarineqartussami pingaaruteqarluinnartumi.

Alliartorneq aamma ineriartornermi misissueqqissaarneq

Naalakkersuisut pilersaarusiitut isummiussaataq alliartornermi aamma ineriartornermi misissueqqissaarneq atorluarneqarsinnaasumik sakuussaaq siunissamut ungasinnerusumut periusissianut aamma pilersaarutit suliarineqassallutik.

Alliartorneq- aamma ineriartornermi misissueqqissaarnerup siunertarissuaa, pilersitsiortornermi piviusorsiortumik missingersuutit atungaasullu oqariartuuteqarsinnaanissaat, siunissami inuiaqatigiinni mittarfittaarnermi sunniutinut.

Suliniutit pingaarnertut suliassaataq tassaassaaq mittarfiliortitsinermit ineriartornermi kingunissaanik assiliartaliisoq, assersuutigalugu ineqarnikkut, meeqeriveqarfik, atuarfeqarfik, takornarialerisut, peqqinnissaqarfik, suliffeqarfii il.il.

Pingaartullit marluk alliartorneq aamma ineriartornermi misissueqqissaarnerup inernerissuaa tunngavilimmik tikkuussineq pingaarnertut akisussaasunut (ass. Naalakkersuisoqarfiit, kommunit aamma inuussutissarsiornerup iluani) aamma pingaarnermik ingerlatitat (ass. Nuna tamakkerlugu takornariaqarnikkut pilersaarut,



malittarisassat/inatsisit, akileraarnikkut aqqissuussat, immikkoortortanut pilersaarutit aammalu annerusumik inuussutissatigut suliniutit). Taamaalilluni sulineq assiliartaliinerussaaq mittarfittaarnermi sukkasuumik ineriartornermi tigussaasunik missingersuutitik.

3. Periusissiami tulleriaarinerit (2023-2024)

Naalakkersuisut siusinnerusukkut suliat aallartisippaat timmisartunut mittarfinnik nutaanik pitsaannerusunillu Kalaallit Nunaanni sanaartorneq. Attaveqaasersuuteqarnikkut pitsanngorsakkanik aqqissuussinerit tunngaviussapput pitsaasut iluaqutaasullu nunatsinnut takornariat amerliartortinnissaannut. Timmisartunut mittarfiit nutaat piareerpata pitsaanerpaamik piareersarsimajumalluta Naalakkersuisut kissaatigaat piffissamut ikaarsaariarfiusumut periusissiaq una killiliussatut atugassarititaasunik pitsaasunik qularnaarisuussasq, Kalaallit Nunaat piareersimaqqullugu takornariat timmisartunut mittarfinnut nutaanut tikilluaqqusarnissaanni.

Naalakkersuisut kissaatigaat takornariat ornittagaanni tikittarnernik aqqissuussinerit pitsaanerpaamik piareersagaanissaat. Piareersarsimassaagut oqimaaqatigiissitsiumalluta takornariartitsinerup akilersinnaasup inuussutaasinnaasullu pilersinnissaanut, ilutigisaanillu pinngortitap avatangiisitta imaannaanngitsup illersornissaanut. Tamatumalu saniatigut uagut nammineq piareersimanerussaagut takornariartitsinerup iluani ilinniagaqarsimassuseq eqqarsaatigalugu. Naatumik oqaatigalugu qularnaassavarput ineriartortitsineq Kalaallit Nunaanni takornariartitsinermik piujuaannartitsiviusumik.

Naalakkersuisut qinersimavaat immikkut aallukkumallugit piffissamut ikaarsaariarfiusumut periusissiami sammisassat immikkoortut pingasut:

1. Atugassarititaasuni killiliussat
2. Tikeraat tikittarfiinik inerisaaneq
3. Piginnaasatigut ineriartortitsineq

Aallartitsisoqassaaq ingerlatsisoqarlunilu suliniutinik pingaarnernik qulinik, immikkoortut suliassaqarfiit immikkoortut ataanni, iliuusissanut pilersaarusiortifiusunik.

3.1 Atugassarititaasut killiliussat

Naalakkersuisut kissaatigaat Kalaallit Nunaanni takornariartitsisarnermi atugassarititaasut killiliussat nukittorsarnissaat, suliniutinik arlaqartunik takornariartitsinerit iluanni ingerlanneqartussanik. Siunertaavoq Kalaallit nunaanni takornariartitsinermik ingerlatsinerup nukittorsarnissaa, aallaaviusut pitsaanerulersinnerisigut piujuaannartitsinermik tunngaveqartumik ingerlatsineq pissusissamisoorsinnaaqqullugu.

Suliniut 1 – Takornariartitsinernut inatsit nutaaq, akuersissummik peqarfiusumik takornariartitsisarnernut inatsit aamma takornariartitsisarnermut attuumassuteqartut inatsisit allat

Takornariartitsinermik inuussutissarsiutit Kalaallit Nunaanni annertusiartornerat ilutigalugu aamma pilersoaqartarpoq pisariaqartitsinermik killiliussat naleqqussarnissaannut, ilaatigut sulisussanik atuinermut atasuni. Naalakkersuisut taamaasillutik kissaatigaat takornariartitsinermut inatsimmik nutaamik aqqissuussinissaq, qularnaarisussamik pitsaannerusumik najukkani pineqartuni ingerlatsisuusut pitsaannerusumik peqataatinneqarnissaannik, aamma pilersitsinikkut ullutsinnut naleqquttunik unammilleqatigiiffiusunillu killiliussatut atugassarititaasunik, Kalaallit Nunaanni takornariartitsinerup ineriartorteqqinneranut atatillugu.



Takornariartartut nunanit allaneersut nunatsinniittartut amerliartornerisigut qanorluunniit ilioraluaaraanni aamma nunanit allaneersut takornariartitsinermik ingerlatsisuusut amerliartussapput. Qularnaarumallugu naleqquttumik pissusissamisoortumillu aaqqissuussamik aqutsineq nunanit allaneersut aammalu illuani nunatsinni najugallit ingerlatsinerisa aqunneqarnerannik aaqqissuussineq, kissaatigineqarpoq pissutsit pineqartut nutaamik inatsisiliornikkut aqunneqarnissaat. Ilutigisaanillu ingerlaqatigiissitsilluni kalaallini takornariartitsinernik ineriartortitsinikkut kalaallini namminerni ileqqut periaatsillu aallaavigalugit aaqqissuussaasunik, misissuinerinik ingerlatsisoqassaaq qanoq suliaasaqarfik takornariartitsinermut inatsisikkut nutaakkut aqunneqarsinnaanersoq pillugu. Takornariartitsinermut inatsimmik suliaqarneq ingerlanneqassaaq qanimut oqaloqagiittarnertigut nunap immikkoortuini takornariartitsisartut peqatigalugit, kalaallit takornariartitsinermik inuussutissarsiortut peqatigalugit aammalu qitiusumik takornariartitsinermi kattuffiit peqatigalugit.

Takornariartitsinermik inuussutissarsiutit angissusiunngilaq uninngaannartoq, kisiannili eqaatsumik tasisuaartutut nunat tamalaat akornanni ingerlatsisunik peqatiginnittoq, politikki, annertussutsit aamma takornariartarnikkut ujartuinerit allanngorartuarfigisaat. Naalakkersuisut kissaatigaat ineriartornermik tamatuminniga malinnaaveqarnissartik, taamaattumik ingerlaavartumik avatitsinni pissusiviusunik naleqqussaasariaqartarlutik. Naalakkersuisut taamaasillutik kissaatigaat nutaamik takornariartarnermut akuersissutinik tunngavilimmik ingerlatsisarnermut nutaamik inatsisiliornissaq, kiisalu najukkani inuunnaat unnuisarfeqartitsisarnerannut inatsisiliornissaq (Airbnb il.il.).

Tamatumani pineqarput inatsisit arlaqartut, pingaarnerillu 2024-imi ukiakkut ataatsimiinnermi saqqummiunneqassallutik.

Suliniut 2 – Umiarsuit takornariartaatit ingerlatsinerat

Umiarsuarnut takornariartaatinut ilaallutik takornariartartut malunnaatilimmik amerliartorput, ersarissivorlu sukaterisoqartariaqartoq ersarissaasoqarlunilu inuussutissarsiummi atugassarititaasunik. Tunngaviusuit ersarissut qularnaassavaat inuussutissarsiummi tassani ingerlatsinerit pitsaanerumik inuussutissarsiutinut allanut, sumiiffinni tikinneqartartuni najugallit pisariaqartitsineri ingerlatsinerillu piujuaannartitsinermik tunngaveqartueneri. Naalakkersuisut kissaatigaat sumiissusilersuinissaq ingerlatsiviusinnaasunik atugassarititaasut aalajangersimasut iluanni ingerlatsiviusussanik imaluunniit inerteqquteqarfiusunik. Tamatuma saniatigut umiarsuit takornariartaatit annerusumik najukkani takornariartitsisartunik atuisassapput, najukkani misigisassanik pisisassallutik il.il., najukkani tikinneqartartuni inuiaqatigiit annerusumik aningaasarsiornikkut iluanaaruteqarsinnaaqqullugit.

Suliniutissat ersarinnerusut allaaserineqarneri 2023-ip naalernerani saqqummiunneqassapput.

Suliniut 3 - Akitsuutit

Akitsuutit aamma akiliutit angalasut pissusilersortarneranni aqutsissutaasut ilagisinnaavaat, ingerlatsinernullu siuarsaataasinnaallutik kigaallassaataasinnaallutilluunniit. Naalakkersuisut piffissami periusissiap atuuffigisaani saqqummiussaqaassapput oqimaaqatigiissaarnerusunik akitsuusersuisarnermut akiliutinillu aaqqissuussisarnermut inuiaqatigiinni ineriartortinneqartussat kissaatigineqartunut atatillugu. Saqqummiussinissaq ataqatigiissaarneqarumaarpoq inuussutissarsiutinik akileraarusersuisarnermik aaqqissuusseqqinnermut ataqatigiissitsisoqarnissaa qularnaarumallugu.

Pilersaarummik saqqummiussisoqassaaq 2024-ip upernaavani.



Suliniut 4 – Takornariartitsinernik assigiissaaraluni aaqqissuussineq

Ukiuni kingullerni piujuaannartitsinermik tunngaveqartumik takornariartitsinermi ingerlatsisoqalernissaanik pisariaqartitsineq annertunerulersimavoq, sillimaniarneq annertusisaq aamma pitsaasumik ingerlatsineq amerlatsutsinut taarsiussaq. Ujartuilluni piumaneq taamaattoq annertusiartortoq nioqqutini pineqartuni pinngortitamillu illersuinerup annertunerusariaqarneranik pisariaqartitsineq takornariartut amerliartortinnerannut taarsiullugu, pisariaqartitsilersimavoq takornariartitsinermi nioqqutigineqartunik assigiissaaraluni aaqqissuussisoqarnissaanik sulii annerusumik.

Taamaattumik Naalakkersuisut atortuulersissavaat takornariartitsinermi nunat tamalaat akornanni pitsaassusissat nutaat pioreersullu, pitsaassusissat qaffasinnerulersikkumallugit, sillimaniarneq piujuaannartitsinerlu ilanngullugit Kalaallit Nunaanni atortuutikkumallugit.

Takornariartitsinermi assigiissaarinerit aaqqissuussat takornariartitsinermik ingerlatsisunit ujartorneqarput, siumullu sammisumik aallussiviussallutik pinngortitamik taamalu avatangiisini mianerinnittumik isumannaatsumillu takornariartut misigisaqartarnissaannik, atuisumut annertusisamik periarfissiisussamik piujuaannartitsisumik ingerlatsinernik toqqaasarnissamik, Kalaallit Nunaanni takornariartitsinermut tamarmiusumut iluaqutaasussanik.

Siunnersuut 2024-imi upernaakkut saqqummiunneqassaaq.

Suliniut 5 – sumiiffinni najugalinnik peqataatitsineq

Najugaqartunik peqataatitsisarneq piffissami ikaarsaariarfimmi aallutassat pingaartinneqartut ilagaat, suliaasaqarfinni tamani atortinneqartussa.

Naalakkersuisut misissorumavaat takornariartitsinerup iluani ingerlatani qanoq ittuni najugaqartut sulisussat iluaqutigineqarsinnaaneri, qularnaarlugulu najugaqartut peqataatinneqartarnissaat sunniuteqartillugillu. Misissorneqassaaq inatsisiliornikkut najugaqartut qanoq aaqqissuussilluni peqataatinneqassanersut.

Takornariartitsinermik ingerlatsisartunut nunanit allaneersunik suleqateqarnermut atatillugu, takornariartunik angallassisartunut atatillugu aamma umiarsuit takornariartaatit tikittarnerinut atatillugu ilanngullugu pisariaqarpoq qanimut misissussallugu najugaqartut peqataatinneqartarneri.

Anguniagaq taanna tunngaviussaaq suliniutit sinnerisa suliarineranni, minnerunngitsumik ukua: 1, 2, 4 aamma 6-ip.

Suliniut 6 – Piujuaannartitsisumik inuussutissarsiutitigut ineriartortitsineq

Aningaasalersuisinnaaneq pitsaannerusoq aallaavissanik pitsaannerusunik takornariartitsinermik inuussutissarsiutit ineriartortinnerannut aallaaviussaaq. Naalakkersuisut misissorumavaat qanoq takornariartitsinernik inuussutissarsiutit tapersersorneqarsinnaanerat, attaveqaqatigiiffiusartut, siunnersuisarnerit

Aningaasalersuinissanik periarfissat naleqqussagaassapput kalaallini aaqqissuussinernut, nunanit allaneersullu aningaasaliisartut Kalaallit Nunaanni takornariartitsinermik inuussutissarsiutini ineriartortitsinerput nunatsinni atugassarititaasunik tunngaveqartoq ataqqissavaat.



Naalakkersuisut aamma ersarinnerusumik misissorniarpaat nunap immikkoortuini isorliunerusunilu pitsaanerusumik naleqqussakkanik siunnersuisarnerit aningaasaliissuteqartarnerillu naleqqussarneqarsinnaanersoq.

Missiliuusiaq kingusinnerpaamik 2024-imi upernaakkut saqqummiunneqassaaq.

3.2 Tikeraanut tikittartunut tikisitsisarfiit

Ullumikkut Kalaallit Nunaannut takornariartartut ujtugareereerpaat ullutsinnut naleqqunnerusut tikisitsisarfiit. Naak Kalaallit Nunaat pissutsini amerlasuuni angalaffittut akisuutut isigineqaraluartoq, Visit Greenland-imiit misissuisarnerit ersersittarpaat takornariartut akiliiumassuseqartut atortulersuutit piusut tikisitsisarfiillu ullutsinnut naleqqussagaappata.

Isumalluarfigineqarput timmisartunut mittarfissat nutaat takornariartitsineramik perrassaasuussasut, nunallu immikkoortuinit aammalu nunatsinnut tamarmut angalajumassuseq suli annertunerulerumaartut. Naalakkersuisut tapersorsorumavaat atortulersuutininik pitsannorsaanerit maanna aamma siunissami takornariartarumaartut eqqarsaatigalugit, pingaartillugillu iliuseqarfigiumallugit nukittorsarumallugillu tikisitsisarfinni atortulersuutininik pitsannorsaanerit Kalaallit Nunaanni.

Suliniut 7 – Attaveqaasersuutit nukittorsakkat

Takornariartartut amerlanerulernerisigut pisinnaatitaaffinnut atatillugu unammilligassanik amerlanerusunik pilersoqarsinnaavoq, nunaminertanik iluaquteqarnermi aamma tikikkuminassutsini. Taamaattumillu pingaaruteqarpoq naleqqussaanaissaq naammassineqarsinnaasunik aammalu killiliussanik, taamaasilluni siunissami aqqiussuussinerit ersarissuutikkumallugit, aalajaatsuutikkumallugit uppernassuseqartikkumallugillu.

Sumiiffiit akuersissuteqarnikkut akiliilluni piniarneq, akuersissuteqarnikkut akiliilluni aalisartitsiviusartut amerlanerulersinneqarneri imaluunniit helikopterimiit qaqqanut nioriarluni sisorartitsisarnerit - heliskiing – assersuutigalugu sumiiffinnik allaffissornikkut aqutsineramik annertunerusumik pisariaqartitsiviussapput.

Tamatumalu saniatigut naatsorsuutigisaqarneq umiarsuaranut takornariartaatinut ilaallutik takornariartartut amerlanerulernissaannik illoqarfinni annerusuni aamma najugaqarfinni minnerni piumasaqarfiussapput annerusunik amerlanerusunillu aningaasaliissuteqartarnissanik umiarsualivinnut taakkunungalugu atatillugu atortulersuutitut.

Akunnittarfiliortitsernernut atatillugu ukiuni arlaqartuni namminersortut aningaasaliissuteqartarneri ingerlanneqarput, siunissami pisariaqartitsilernissat naammassineqarsinnaaqqullugit. Naalakkersuisut sulissutigissavaat takornariartitsinermut atatillugu atortulersuutininik nukittunerulersitsisoqarnissaa, najukkani namminerni ingerlatsisuusut innuttaasullu sapinngisamik annertunerpaamik peqataatinneqarnerisigut.

2023 naatinngu siunnersuummik saqqummiussinissaq naatsorsuutigineqarpoq.

Suliniut 8 – Pinngortitaq allannguataasooq – kulturikkut misigisassat

Ingerlaavartumik ineriartortitsisoqartuassaaq immikkuullarissunik imaannaanngitsunillu issittumi misigisassanik puijuaannartitsineramik qitiutitsiutigaluni.

Tamatumungalugu atatillugu Naalakkersuisut misissorniarpaat takornariartitsineramik ineriartortitsinerup qanoq “tasiorteqarsinnaanera” nunap immikkoortuininik eriagisanik toqqaasarnermik UNESCO -llu nunarsuarmitut eriagisaannik immikkoortuininik. Takornariartartut amerliartornerisa piumasaqateqarfigaat nioqutit misigisassat



periarfissallu amerlanerusut, Naalakkersuisullu pingaartippaat ineriartortitsinerup tamatuma ataqatigiissaagaasumik ingerlanneqarnissaa, piujuaannartitsinermi ileqqussanik tunngaveqartumik aqqissuussaasunik.

Naalakkersuisut kissaatigaat namminersorlutik inuussutissarsiuteqartut takornariartitsinerum attuumassutilinnik nioqqutinik misigisassanillu neqerooruteqartarnissaat, tamakkualu ilutigisaannik suliffeqarfiit inuussutissarsiortut aningaasarsiornermikkut perrassarneqarnerannik pilersitat kinguneqartassasut.

Taakkualu saniatigut kissaataavoq siunissamut sammisumik ineriartortitsinerup ingerlatsinerullu tikeraat ornittagaannik nunatsinnilu takujuminartunik suli nukittunerusumik nunap immikkoortuini namminersortutullu inuussutissarsiortuni akornanni inissisimaffeqassasut.

Taamaasillutillu Naalakkersuisut suliniutinik aallartisaassapput oqaloqateqarnikkut aamma suleqatigiinnik aallartitsinikkut soqutigisaqatigiinnik, sulianik immikkoortitsisussanik, qanoq piujuaannartitsisumik pinngortitami kulturimilu misigisassat nukittorsaavigineqarnissaat, kommunini aammalu inuussutissarsiortuni namminersortuni inissisimasumik.

Suliat piffissami periusissiap atuuffigisaani tamarmiusumi ingerlanneqassapput, soorlutaaq naatsorsuutigineqartooq suliat taakkua aamma immikkoortumut pilersaarummi 2025-imiit atuuttussami ilaassasut.

Suliniut 9 – Piffissap takornariartitsiviusartup sivitsorneqarnissaa

Suli annertunerusumik takornariartitsinerumik inuussutissarsiutit nukittorsarumallugit Naalakkersuisut kissaatigaat misissorumallugu qanoq takornariartitsisarnerup maanna piffissaq ingerlatsiviusartooq qaangerlugu siaruarneqarsinnaanersoq, taamalu ukiup sinneranut - ullumikkut pissusiusumut sanilliullugu - assigiaarnerusumik siaarneqarsinnaanersoq.

Aningaasarsiornermikkut isaatitsineq piffissaq maanna ingerlatsiviusartooq qaangerlugu ingerlasartooq Kalaallit Nunaanni takornariartitsisarnerumik ingerlatsinerumik ataatsimut isigaluni perrassaasinnaavoq, takornariartitsinerlu annerusumik nappataasinnaangorsarlugu.

Naalakkersuisut aamma Visit Greenland taamaattumik suli itinerusumik paasiniaaniarput qanoq iliuuseqartoqassanersoq takornariartitsineq Kalaallit Nunaanni ukiup iluani piffissami annertunerusumi ingerlanneqartalersinnaanersoq eqqarsaatigalugu, ilaatigut misigisassat imaannaangitsut neqeroorutaasartut annertunerulersinnerisigut piffissami maanna ingerlatsiviusanngitsumi, tamatumuunala aningaasarsiorneq aningaasaliissutillu erniortinneqarnerat annertusarniarlugu.

Suliat taakkua piffissaq periusissiap atuuffigisaa tamaat ingerlanneqassapput, naatsorsuutigineqarporlu aamma immikkoortumut pilersaarummi 2025-imiit atuuttumi ilaassasut.

3.3 Piginnaasanik ineriartortitsineq

Ilinniartitaaneq aamma piginnaasat pigisat takornariartitsinerumiittut nukittorsaavigineqassasut kissaatigineqarpoq, suli amerlanerusut ilinniagaqarsinnaanermut pikkorissaqqissinnaanermullu ajornannginnerusumik aqutissiuunneqarnerisigut. Nukittorsakkamik ilisimasanillu tunngaveqartumik takornariartitsinerumi inuussutissarsiut aqutissiuussisaaq tunngavissanik patajaatsunik siunissamut sammisumik Kalaallit Nunaanni takornariartitsinerumik ineriartortitsineqataasinnaasumut. Piginnaasanik nukittorsaaneq ilalersorneqassaaq pilersitsiumanermik ineriartortitsinermillu puilatitsinerumik, tamatumalu saniatigut immikkut inuusuttut matumani aallunneqassallutik.



Suliniut 10 – Ilinniartitaanerit nukittunerusut aamma piginnaasaqarluarneq

Ullumikkut Kalaallit Nunaanni sulisussanik amigaateqartoqarpoq, aamma takornariartitsinermi. Ajornartorsiut taanna aaqiivigineqanngippat takornariartitsinermi periarfissat piusut tamakkiisumik inerisarneqarsinnaanngillat. Taamaattumik Kalaallit Nunaat siunissamat isigisumik pikkorinnerulertariaqarpoq sulisussanik naammattunik kajungernerusumillu ilinniartitsisinnaanermut, takornariartitsinermik inuussutissarsiutinut sammisuni suliffissani, matumani aamma takornarianik angallassisartunik - turistguider - aammalu suliffissanut takornariartitsinermik tapersersuutaasunut allanut sammisuni.

Takornariartitsinermik inuussutissarsiutit ukioq kaajallallugu suliffissanik neqeroorsinnaasariaqarput, peqataasinnaasunik sulisussanik pikkorissunik piginnaaneqarluartunillu nutsuisinnaajumallutik, tassuunakkullu takornariartitsinermik inuussutissarsiutit nukittunerulersikkumallugit.

Naalakkersuisut ilinniartitaanerit ingerlatsisut matumunnga naleqquttut aamma Visit Greenland suleqatigalugit misissorniapaat qanoq ilinniartitaanerit piginnaasanillu annertunerulersitsisarnerit nukittorsarneqassanersut suliassat matumaniittut siammasissumik isigalugit.

Suliniutit piffissami periusissiap atuuffigisaani tamarmiusumi sulissutigineqassapput, kisiannili 2024-ip ukiaani siunnersuuteqartoqassaaq.

Suliniut 11 – Ilisimasanik annertusisanik peqarnissaq

Piginnaasanik nukittorsaaneq ilalersorneqassaaq tigussaasunik atorsinnaasunillu paasissutissanik aamma kisitsisinik paasissutissanik, taamaasilluni takornariartitsinermik inuussutissarsiutini kinguneqartussanik aalajangiisarnerit paasimasanik tunngavilimmik aalajangerneqartaqqullugit.

Inuiaqatigiinnut sunniutaasartut piviusut uuttorneqartalersinnaaqqullugit, tamatumani aningaasatigut iluanaarutaasut Kalaallit Nunaanni takornariartitsinermeersut Naalakkersuisut kissaatigaat takornariartitsinermit naatsorsuusiortarnermik suliat nukittorsarneqassasut. Naatsorsuutit sunniutaasuinnik, kaaviiartitanik, suliffissanik pilersitanik aamma Kalaallit Nunaannut isertitanik takornariartitsinermeersunit imaqtartut uuttorneqarsinnaapput nunat tamalaat akornanni aaqqissuussinerit atuuttut tunngavigalugit.

Suliniut peqataassaaq paasissutissanik tunngaviusunik aaqqissuussinermi, aamma Kalaallit Nunaanni takornariartitsinermut atatillugu ilisimasassanut, taamaasillunilu pingaaruteqartumik peqataassalluni Kalaallit Nunaanni takornariartitsinerup sunniutaasa ersersarneqarnerannut, taamalu aamma piujuaannartitsinermut. Suliami tassani ilisimasassat pisariaqtartut aamma takornariartitsinermik ingerlatsisut ilaassapput isumasioqatigisakkatut Kalaallit Nunaanni naatsorsueqqissaartarfik aamma Visit Greenland peqatigalugit.

2023 naatinngu siunnersuummik saqqummiussisoqassaaq.

Suliniutitimmikkoortunik aqqanillit suliaqarnerit piffissami periusissiap atuuffigisaani aallertinneqassapput, naatsorsuutigisariaqassaarlu takornariaqartitsinermut immikkoortortami pilersaarutip tulluuttup atuuffiani aamma ingerlaqqittussatut, naammassineqarsinnaasunik inerisaaneq, kisitsisinik paasissutissanik katersisarnerit aamma inatsiliornermik suliat ukiut arlaqtartut ingerlaneranni pissammata.

4 Suliniutissat aalajangersimasut

Suliassaqarfik	Nunap immikkoortuiniit ilassutit	Suliniutissat aalajangersimasut
Suliniut 1 – Takornariartitsinermi inatsit nutaaq, Immikkut akuersissutitut inatsit aamma takornariartitsinermit attuumassutilinnik inatsisit allat	Kissaat inatsisip atuuttup aamma nutaassap takornariartitsinermit inuussutissarsiutitut sammisussap tulleriarinermit salliunissaa avatangiisinilu pissutsitut nutaanut naleqqussagaanissaa.	Takornariartitsinermit inatsisissamut siunnersuut, takornariartitsinermit akuersissutitut inatsit aamma inissianik attartortitsinermit inatsisissaq Inatsisartunut 2024-ip ukiaani saqqummiunneqassapput
Suliniut 2 – Umiarsuit takornariartaatit ingerlatsinerat	Umiarsuit takornariartaatit angalasarneranni killiliussanik aqqissuussineq, aamma umiarsuit takornariartaatit inuiaqatigiinnut tunniussassaqarnerulernissaat	Nunamukarsinnaanerup aqqissuunneqarnera aqutamik, sumiiffinnik zone-nut aqqissuussinikkut. Inatsisissamut siunnersuut Inatsisartunut 2024-imi ukiakkut saqqummiunneqassaaq
Suliniut 3 - Akitsuutit	Akitsuusersuinermit aqqissuussinerit oqimaaqatigiissaarneqarnissaannik kissaateqarneq, nunatsinni takornariartitsinermit iluaqutaanerusunik, sumiiffinnut pisariaqartitsiviusunut iluaqutaasussanik.	Siunnersuusiortoqassaaq takornarianut akitsuummik /akilerarummik nunani allani ilisimaneqartumik. Inatsisissamut siunnersuut 2024-ip ukiaani saqqummiunneqassaaq.
Suliniut 4 – Takornariartitsinermit assiissaarinerit	Assigiissarinerit ersarissut, pitsaassusissani, sillimaniarnermit aamma piujuaannartitsinermit.	Piujuaannartitsinermit, pitsaassusissani aamma sillimaniarnermit qularnaagassat takornariartitsinermit, takornariartitsinermit nioqqutinik neqerooruteqartarnermit. Piumasaqaatit ilanngunneqassapput takornariartitsinermit inatsisissamut siunnersuummi Inatsisartunut 2024-ip ukiaani saqqummiunneqartussami.
Suliniut 5 – Najugaqartut peqataatinneqarnerit	Annertusisamik aallussineq ingerlatsisut maanimit iluaqutissaannik pilersitsinissanik.	Tamakkiisumik najugaqartut, ingerlatsisut, peqataasut tunniussaartartullu takornariartitsisartut Kalaallit Nunaanni iluaqutissanik pissaqassapput, nunanut allamiunut sanilliullutik. Piumasaqaatit atortuulersinneqassapput takornariartitsinermit inatsisissakkut Inatsisartunut 2024-ip ukiaani saqqummiunneqartussami. 2024-imi aasaq sioqqullugu nunamut tamarmut atuuttussat periaassat ileqqorineqartussat pillugit ilitsersuut sulianerineqarsimassaaq Visit Greenland, kommunit aammalu takornariartitsinermit ingerlatsisut suleqatigalugit. Paasisitsiniaasoqassaaq / qaammarsaasoqassaaq takornariartitsinerup nuannaarutissartaanik aamma peqataanissamut periarfissat pillugit. Paasisitsiniaanissaq kingusinnerpaamik februarimi 2024 piariissaaq.
Suliniut 6 – Aningaasalersuisinnaanermut periarfissat pitsaasut	Aningaasalersuisinnaanermut periarfissat pitsaasut takornariartitsinermit inuussutissarsiutit	Attartorsinnaanermik aningasalersuisinnaanermillu periarfissanik qulaajaaneq. Qulaajaaneq tigussaasunik iliuusissanik kinguneqarsinnaavoq,

	<p>iluaqutigineqarsinnaassapput. Aningaasaliisartut nunanit allaneersut eqqarsarluarluni peqataanissaannut neqeroorfineqassapput, tulleriaareernerit maani tunngavigalugit.</p>	<p>takornariartitsinermik Kalaallit Nunaanni ataatsimut perrassaasinnaasumik. Qulaajaaneq 2024-imi naammassineqarsimassaaq.</p>
<p>Suliniut 7 – Attaveqaqatigiinnikkut aqqissuus-sinerit pitsannorsakkat</p>	<p>Anguniarneqassaaq naammassineqarsinnaasut aamma killiussat imminnut naapertuuttunik aqqissuunneqarsimanissaat, siunissamullu periusissanik pilersaarusiat ersarissuussallutik, aalajaatsuussallutik uppernassallutillu imaluunniit piviusorsioruussallutillu.</p>	<p>Ineriartortitsineq, aserfallatsaaliinerillu nungullartunik sanaartugaatinik aamma pingortitamik. Aningaasaliissutit katillugit 9,5 mio. kr.-inik annertussuseqartut 2023-2026-imut, Nunat Avannarlerni (Nordatlantiske Pulje) aningaasaliissutaanik aningaasalerneqarluni (danskite ukiormut immikkoortitsillutik aningaasaliissutigisartagaat) siunertanut atorneqassapput.</p>
<p>Suliniut 8 – Pingortitami misigisassat piujuaannartitsinermik tunngavillit</p>	<p>Ingerlaavartumik ineriartortitsisoqassaaq pingortitami aamma kulturikkut misigisassanik imaannaangitsunik ukioq kaajallallugu, issittumi pissutsini qaffasinnerpaami inissisimasunik, piujuaannartitsinermik annertusisamik isiginiarfiusumik.</p>	<p>Kommunillu isumasioqatigiittarnerit kingunerissavaat misigisassatut suliniutissanik nutaanik tigussaasunik suussusilersuisarnissat, 2024-imi aallartinneqartussanik.</p>
<p>Suliniut 9 – Piffissap takornariartitsinikkut ulapiffiusartup tallineqarnissaa</p>	<p>Neqeroorutit annertusisat misigisassanik pilerinartunik soqutigintunillu piffissami inissaqartitsiviusumi atorneqanngitsumi, tassuuna ukioq tamaat takornariartitsineq annertunerulersikkumallugu, aningaasanik isaatitsineq, aningaasaliissutit erniornissaat, suliffissat allallu annertunerpaaffissaminiitsikkumallugit.</p>	<p>Ingerlatsisut nalequttut suleqatigalugit neqeroorusioruqassaaq piffissami ulapiffiunnginnerusartumi neqeroorutissanik suliniutinik. Perrassaaneq ussassaarinerlu 2024/205-imi pissapput.</p>
<p>Suliniut 10 – Ilinniartitaanerit nukittorsakkat pikkorissartitsisarnerillu</p>	<p>Takornariartitsinermik inuussutissarsiutini ilinniarsimassuseq nukittorsarumarneqarpoq, amerlanerusut ilinniagaqarnissamut pikkorissaqqissinnaanermullu periarfissaqartinnerisigut. Takornariartitsinermik inuussutissarsiutit ukioq tamaat sulisussaminnut atorfeqarnissamut neqerooruteqarsinnaassapput, sulisussanik pikkorissunik piginnaanilinnillu nutsuiffiusumik.</p>	<p>Amerlanerusut aamma nutaajusut takornariartitsinermi ilinniagaasinnaasutut periarfissat najukkani namminerni neqeroorutaalissapput, ilinniartit pioreersut suleqatigalugit. Suliniutissat nutaat 2024-imi ukiakkut neqeroorutaalissapput.</p>
<p>Suliniut 11 – Ilisimasanut tunngaviusunik annertusaaneq</p>	<p>Kissaatigineqarpoq inuiaqatigiit aningaasarsiornerannut uppernarsaasernerit kisitsisinillu paasissutissanik tunniussisinnaanerup annertunerunissaat, takornariartitsinermik inuussutissarsiutini aalajangiisarnernut atorneqartussanik.</p>	<p>Aallartitsineq qulaajaanerlu takornariartitsinerup aningaasarsiornikkut sunniutaanik piviusunik (TSA). Periaasissaq aalajangersimasooq tassaassaaq naatsorsuusioriaatsimik aqqissuussineq, takornariartitsinermi aningaasarsiornermik ersersitsisartumik suliffissaqarnikkut sunniutaasut Kalaallit Nunaannut pingaaruteqartut ilanngullugit, kisitsisilersorlugit takornariat aningaasat qanoq amerlatigisut atortarneraat, inuussutissarsiummilu suliffiit qanoq amerlatigineri. Ataavartumik TSA 2024 kingornagut qularnaarneqassaaq.</p>

Naalackersuisut inassutigineqartut tamaasa ullormit siullermit aaqiissutissarsisinnaassanngilaat, kisiannili paarlattuanik aallarniutigisinnaallugit pisariaqarnerit ujartorneqartullu sammivinni piumaneqartuni. Inassuteqaatit ilaat arlaqartut siunissaq ungasinnerusoq eqqarsaatigalugu takornariaqartitsinermut immikkoortumi ilanngunneqarsinnaapput, tamannalu aaqiissuussaankkut malittarisassaassaaq, takornariaqarnikkut ineriartornermi sinaakkutaasussani.

5. Takornariartitsineq kisitsisinnngorlugu

Takornariartitsinermik Kalaallit Nunaanni isumalluarneq annertuujuvoq. Tamanna minnerunngitsumik ersersinneqarpoq sanaartukkani amerlasuuni atortulersuutissanillu sanaartornerni ukiuni makkunani ingerlarsortuni, minnerunngitsumik timmisartunut mittarfissualiornikkut.

Taamaakkaluartoq ukiuni kingullerni aamma aqut maniilaqartarsimavoq. Minnerunngitsumik COVID-19 -imik nappaassuaq Kalaallit Nunaanni takornariartitsinermik annertoorsuarmik eqquisimavoq. Kisiannili takornariartitsineq ataatsimoortumik annerusumik isiginiaraanni qanoq ineriartorsimanerluni?


Uni ataani naatumik killiliilluni naliliisoqarpoq ineriartornermik timmisartunut ilaasuni, akunnittarfinni unnuisarnerni aamma ukiuni kingullerni umiarsuarnut ilaallutik Kalaallit Nunaannut takornariartartut eqqarsaatigalugit.

Timmisartunut ilaasut

Timmisartunut ilaallutik nunanit allaniit piffissami 2015 -imiit 2019 -imut tikittartut, COVID-19 sioqqullugu amerliartornerat killeqarsimavoq.

Kisitsisit 2022 -imeersut taamaakkaluartoq takutippaat nappaassuaq sioqqullugu angusat maanna qaangerneqartut. Taamaasilluni ukioq 2022 tassaalerpoq takornariartartut Kalaallit Nunaannut ingerlasartut amerlanerpaaffigilgaat.

Nunanit allaniit timmisartunut ilaallutik angalasut amerleriaateqarsimapput (DK ilanngullugu) Kalaallit Nunaannit ingerlaqqittartut 2,6 %-inik, ukiumut tamanna tikillugu pitsaanerpaaffiusumut 2019-imut sanilliukkaanni. Kisitsisit pigineqartut 2022-imoortut aamma Q1-23, kiisalu niuerfiusunit pingaarnernit kisitsisit paasissutissat tunngavigalugit ilimanaateqarpoq annertusiartuinnartumik ineriartortoqarnissaa ukiuni ukunani Kalaallit Nunaanni timmisartunut mittarfissat nutaat ammarnissaasa tungaanut¹.



Akunnittarfinni unnuisartut

¹ Kilde: Visit Greenland, Turismestatistik rapport Grønland 2022.

Unnuisarfeqarnermi nunanit allaneersut unnuisarfinni unnuiartut amerleriaateqarsimapput takornariat 127.249 -niit 2019-imi 164.717 -inut 2022-imi, annertuseriaataasooq 29,4 % -iulluni unnuisartuni kalaaliunngitsuni.

Akunnittarfiliortitsernerit amerlasuut ukiuni aggersuni unnuisartut amerliartornerannik sulii annerusumik pilersitsisussaassaaq. Nalunaarsorneqarsimasut unnuinissamat periarfissat akunnittarfinniittut saniatigut inuinaat unnuisarfiutaanni aamma unnuinissamat periarfissaqarpoq, assersuutigalugit Airbnb.

COVID-19 sioqqullugu akunnittarfinniittartut tikeraat ineriartornerat aamma pitsaasimavoq. Katillugit taamaasilluni nunanit allaneersut unnuisartut 37.160 -inik amerlanerusimapput 2015-imut sanilliullugu. Annertuseriaat 28 %-i. Piffissami pineqartumi nunap nammineq iluaneersut unnuisartut annertuseriaataat annikinnerusimavoq, unnuisartut 10.151 -inik amerleriaateqarsimallutik, assigalugu annertuseriaat 7,7 %. Taamaattumik Kalaallit Nunaanni akunnittarfiit ukiuni ukunani sanaartorneqartut piumanearluarput, tassami akunnittarfinni unnuisartut amerlassusaat qummuinnaq ukiuni arlaqartuni ingerlammat

Umiarsuarnut takornariartaatinut ilaasut

Umiarsuarnut takornariartaatinut ilaallutik takornariartartut Kalaallit Nunaat pigiliussimavaat. 2015 -imi katillugit 25.049 umiarsuarnut takornariartaatinut ilaasut Kalaallit Nunaannut tikeraarsimapput, 2022 -imilu kisitsisit qaffariarsimallutik umiarsuarnut takornariartaatinut ilaasut 43.999 -inut, qaffariaat 75 % -it missaanniittoq.

Naallu 2020 -imi aamma 2021 -imi umiarsuarnut ilaalluni takornariartoqarsimangikkaluartoq, COVID-19- ip kinguneranik, kisitsisit 2022-imut 2018 aamma 2019 -imut nallersuussinnaapput.

Kisitsisit Q1 2023 siulliit maannamullu inniminniisimasut 2023-ip sinneranut ersersippaat 2023-imi Kalaallit Nunaanni umiarsuarnut takornariartaatinut ilaasut eqqarsaatigalugit qaffasinnerpaalertussatut naatsorsuutigisariaqartoq. Ineriartorneq tamanna ersersitsivoq soqutiginninnermik annertuumik, aamma umiarsuarlutik takornariartarnermik Kalaallit Nunaannut annertuumik periarfissaqarfiusumik.

Pingaartitat

Naalackersuisut takorloorpaat Kalaallit Nunaat tassaalissasoq nunarsuup issittortaani takornariartitsivik pitsaassutitsigut qaffasinnerpaami inissisimasoq, takornariartitsinerlu nunatsinni inuussutissarsiutit nappataasut ilagilissagaat, tunniussaqaartartoq suliffissanik nutaanik inuiaqatigiillu kalaallit aningaasarsiornerata pitsanngoriartorneranut aqquissiuusseqataasoq.

Anguniakkat

Naalackersuisut anguniarpaat qularnaarumallugu pitsaassusilimmik piujuaannartitsinermillu tunngaveqartumik takornariartitsinikkut ineriartortitsineq, takornariartitsinermillu inuussutissarsiutini killiliussatut atugassarititaasunik pitsaanerpaanik peqarnissarput, suliaassarfik ineriartorsinnaaqullugu nalilinnillu pilersitsisinnaaqullugu innuttaasut peqatigalugit, namminersortutut inuussutissarsiuteqartut, nunatta immikkoortui aamma pisortat qanilluinnartumik peqatigalugit aqqissuussaasumik.

COVID-19

Nappaassuup COVID-19 nalaani nunatsinni inuussutissarsiutini takornariartitsinermik ingerlatsineq sakkortunerpaamik eqqugaavoq. Nappaassuup kingunerisaanik takornariartitsinermik inuussutissarsiortut suliffeqarfiit inuussutissarsiutillu tamatumunnga attuumassuteqartut aningaasatigut kaaviiartitamikkut annertooujussuarmik appararfiupput. COVID-19 -ip kingunerisaanik Naalackersuisut ukiumi 2020 aamma 2021 ikiorsiissutitut aqqissuussinernik arlaqartunik pilersitsisariaqarsimapput, siunertaqartunik inuussutissarsiutit ikiorserneqarnissaannik, minnerunngitsumik takornariartitsinermik inuussutissarsiutit, aammalu akunnittarfiit, neriniartarfiit kiffartuussinernillu inuussutissarsiortut ilaat. Kisitsisit nutaat 2023 -imi qaammatini siullerni pingasuneersut ersersippaat Kalaallit Nunaanni takornariartitsinermik inuussutissarsiutit 2019 -ip nalinganik ingerlaqqilersimasut.

Staycation-kampagne ”NUNARPUN NUNAN”

COVID-19 -imi pissutsit kingunerisaannik Kalaallit Nunaanni takornariartitsisarnikkut suliniutinik nutaanik aallartitsisoqarpoq. Assersuutissaavoq nunatsinni namminermi sulinngiffeqarsinnaaneq pillugu paasisitsiniaaneq – Nunarput Nuan. Paasisitsiniaaneq imaluunniit ussassaarineq Visit Greenland -imit COVID-19 -ip kingunerisaanik takornariartitsinermut pitsaanngitsunik sunniutaasut tunngavigalugit pilersinneqarpoq. Paasisitsiniaanermi siunertaavoq nunatsinni najugaqartut kajumissaassallugit nunatta iluani misigisassarsiorsinnaanermik, ilutigisaanillu takornariartitsinermik inuussutissarsiutit ikiorlugit, ungasinnerusumut piujuaannartitsinermik angusariartorumalluni. Nunatsinni najugaqartut amerlasuut periarfissaq tamanna atorluarpaat. (Uannga: nunarputnuan.gl)

Takornariartitsinikkut suliniutit piujuaannartitsinermik tunngavillit

Kalaallit Nunaanni takornariartitsineq ineriartorteqqinneqassaaq piujuaannartitsinermik tunngavilimmik. Tamanna isumaqarpoq aqqissuussinerit najukkanit namminernit aallaaveqassammata ineriartorteqqarfiullutillu, iluanaarutitsigut aamma suliffissaqartitsinikkut, nunatsinni kulturitta pigiinnarnissaanut, aammalu pinngortitap avatangiiserisatta pitsaanngitsumik sunnerneqarsinnaaneranik pinngitsoortitsiviusumik. Anguniagaqarnikkut takornariartitsinermik inuussutissarsiutit siunissami nappaasunut inuussutissarsiutinut ilaalernissaannik, kiisalu aamma isumalluarnermik naatsorsuutigisaqarnermillu nunatsinnut takornariartartut amerliartornissaannik, suli annertunerusumik aallussisoqartariaqarpoq ineriartortitsinerup piujuaannartitsisumik tunngaveqarnissaannik, nunami tamarmi aamma nunap immikkoortuini. Taamaasillunilu suliniutinik nutaanik aallartitsisoqartarnerani Naalackersuisut kissaatigaat piujuaannartitsinerup aallaqqaataaniilli pissusissamisoortumik ilaatinneqartalernissaa tunngavissatut. Taamaammat matumuuna takornariartitsinermik inuussutissarsiuteqartut kaammattorneqarput piujuaannartitsineq pigiliutissagaat, aammalu akuersissutinik allagartaqartarneq atulissagaat ulluinnarni ingerlatsinerup ilaatut. Nunat tamalaat akornanni aamma nunani avannarlerni immikkut isiginiarlugu aallunneqalerpoq piujuaannartitsinermik tunngavilimmik takornariartitsinikkut ineriartortitsineq. Ineriartornerup tamatumaa Kalaallit Nunaanni aamma ilisarnaatinnagornissaa Naalackersuisut kissaatigaat. Takornariartartut namminneq ataasiakkaarlutik annertunerujartortumik

eqqumaffigileriarthorpaat avatangiisit aamma pinngortitamut sunniutaasartut, taamalu tapersorsorumallugit suliniutit naleqquttumik pissusissamisoortumillu takornariarnermi misigisassarsiortarneq.

(Uannga: UNEP/WTO: MAKING TOURISM MORE SUSTAINABLE - A Guide for Policy Makers, 2005,” Tourism that takes full account of its current and future economic, social and environmental impacts, addressing the needs of visitors, the industry, the environment and host communities”)

Nalunngiliuk

... Kalaallit Nunaanni misilittagaqarfigineqareemat suliffissuaqarfiit akulerunneqartarnerat takornarianut takujuminartunik aqqissuussisarnerit eqqarsaatigalugit? Qaortumi Kalaallit Nunaata Ammeriviata puisit amiinik suliareqqiisarfiutaani 2017-imi pilersinneqarpoq **Greenland Seal Center**. Tassani oqaluttuarineqartarpoq puisip inuullu ataatsimut oqaluttuassartaat, saqqummersitsinertigut aamma nioqqutissiatigut. Tikeraat qitiusumik ornittagaanni nassaassaavoq amernik mersortarfiusimasoq siulleq 1982-imi ammarneqartoq. Tassani takuneqarsinnaapput qanoq sulisoqartarnersoq ammeraluni aamma nutaaliaasunik ammeraluni, aamma ammerineri tunngaviusut ileqqut. Pissusiviusullu tassaapput teknikkut ileqqullu matumani pineqartut nunatsinni kalaallit kulturianni ukiuni tusintilinni atugaasimani. (Uannga: <https://www.greatgreenland.com>).

Nalunngiliuk

... Dronning Margrethe II -ip ilulissat Kangiani sermersuup eqqaani tikeraat ornittagaat 2022-ip aasaani ammarmagu? **Ilulissat Kangiata Illorsua** tikeraanik periarfissaqartitsivoq sermip uukkartarneranik piurtumik malinnaaveqarnissamik, aammalu silaannaap allanngoriartornerata kingunerisaasa misiginissaannik. Kangiata Illorsuani tikeraat “angalasinnaapput” piffissami saqqummersitakkut ”Sermeq pillugu Oqaluttuaq”. Saqqummersitsineri qitiusumik takutinneqarpoq sermersuatsinni qillerineq, oqaluttuortoq kulturimik aamma silaannaap allanngoriartorneranik ullumimiit utimut ukiunut uagut naatsorsueriaaserput sioqqullugu 124.000 -inik uterluni. (Uannga: <https://isfjordscentret.gl/da/ilulissat-isfjordscenter/>).

Nalunngiliuk

... periarfissaammat Kalaallit Nunaanni **nannunik takusassarsiorluni** angalaartoqarsinnaanera? Inuit ukiuni kingullerni 2-ni Kalaallit Nunaanni akileraartartuusimasut inuillu allattorsimaffianni Kalaallit Nunaanni nalunaarsorsimasut piffissami qinnuteqarfigisaminni akuersissummik peqarlutik akiliuteqartitsillutik piniariarnertaqanngitsumik nannunik (*Ursus maritimus*) takusassarsiortitsisinnaapput. ”Akiliuteqarluni piniariarnertaqanngitsumik takornariartitsineq” taaguutaavoq ataatsimut takornariartitsinerimik ingerlatsisarnernut nannunik takusassarsiorluni, piniariarnanili.

FN -ip nunarsuarimiunut 2030 -imut anguniagai

Naalackersuisut kissaatigaat ukiuni aggersuni Kalaallit Nunaanni takornariartitsinikkut ineriartortitsineri FN-imi piujuaannartitsinerimik anguniakkat ilaatinneqalernissaat. Nunarsuarimiut anguniagaanni immikkut toqqakkanik piffissamat ikaarsaariarfiusumut periusissiamut ilanngussinikkut Naalackersuisut kissaatigaat allaaserissallugu qanoq Kalaallit Nunaanni nunarsuarimiut anguniagaasa takornariartitsineri politikkimut ilaatinneqarneri. FN -imi piujuaannartitsinerimut atatillugu anguniakkat 17 -it aamma anguniakkani immikkoortut 169 -it qinerneqarsimapput nunarsuarimiut anguniagaat sisamat, immikkut pingaartillugit piffissami periusissiaqarfiusumi aallunneqartussat. Tassani pineqarput nunarsuarimiut anguniagaat 4 “pitsaassusilersukkanik ilinniartitaanerit”, nunarsuarimiut anguniagaat 8 »suliffissat naammaginatut aamma aningaasarsiorinikkut siuariartorneq«, nunarsuarimiut anguniagaat 9 »Suliffissuaqarneq, ineriartortitsineq aamma attaveqaasersuutit« aamma nunarsuarimiut anguniagaat 12 »Akisussaassuseqartumik atuineq aamma nioqqutissiorneq«. Nunarsuarimiut anguniagaannik pineqartunik sisamanik immikkut aallussinerup mattutinngilaa nunarsuarimiut anguniagaasa allat taakkualu immikkoortuisa piffissami periusissiap atuuffiani aamma aallunneqarsinnaaneri. Nunarsuarimiut anguniagaasa sisamaasut pineqartut periusissiami iliuusissat ilalersorpaat, aammalu naleraassallutik pineqartunik anguniagaqarnermi.